

Peirigòrd, quand ribiera e *terra* balhan lo nom d'un *país*
A tu que las vinhas d'*atge* bilhan de *porpre*
De las pradas, de las forests, *endurmit* en fisança, ne'n suertes tot *verd*
Tu que lo reirelutz de tos casses *sornes* chapelan de *negre*
Tos puegs, *linçòu* de calcari, se vestissen de borrilh *blanc*
Terra de trobadors, terra d'acuelh e d'*amor*, demoras dins mon *còr*.

Peirigòrd, per te coneitre te fau tucar au *còr*,
Se fau tàiser e t'escotar, mon *país*,
Devem acceptar de legir, entre las linhas, non mas que lo *blanc*
Fau capit(ul)jar, dau sang dins tas venas, ne'n veire que lo *porpre*
Quand lo ciau, dins ton arma, vira que viraràs au *negre*
Remembras, que, a la prima, un aubre totjorn tòrna au *verd*.

Per poder chaminar luenh, a una passada, fau coneitre lo *vers*
Lo vers o lo devers, quò guida, mena, lo *còr*
Dins la nuech, fauta d'estelas, gardarem lo pè *negre*
Que daus uelhs, daus dets e de las bochas perdem lo *país*
E que perduts dins lo drapeu dau torerò, vesem tot de *porpre*
Fau ben aver de las raiç, per, de las alas, ne'n veire lo *blanc* !

Daus autres, fau ne'n prendre, ne'n perdre, los accents, far semblant, far sang *blanc*
Per saber que dins la vita, nonmàs podem 'nar *vers*
Ne'n tucar la mecha, ne'n veire lo *porpre*
La colera e lo desesper dins lo *còr*
Non, crese pas mon *país*
Que siàs bilhat mas de *negre*.

Laidonc, anem, seguem los punchs *negres*
De las discutidas, daus textes, enquera cercham los *blancs*
Mas totjorn, en repleja, seràs 'quí mon *país*,
Ofrissent un sòu, un sosten, la lum de l'esper *verd*
Las colors s'eschapan, sabronban dau *còr*
Los plasers de la vita, quand sus las jautas monta lo *porpre*

De l'*atge* ne'n as la maturitat, coma un bon vin *porpre*
Lo Peirigòrd, coma un òme *sorne*, gardará l'uelh *negre*
D'una ersa, la de l'*amor*, chapviraràs mon *còr*
Coma d'un *linçòu*, me vestirai de *blanc*
Per m'*endurmir*, en fisança, quand marmusaràs tos *vers*
De la *terra*, dau ciau, de las estelas, ses quí mon *país*.

De la nuech, los linçous surtirán *porpres* mas *blancs*,
Coma dins la planta, la jòunessa 'justará, juntará, au *negre* lo *verd*,
A la punta daus pès, au chap de chasques dets, traparàs mon *còr*, ò mon *país*.